

их в Новгороде в Великом. Того ж лета мая в 16 преставися Коломенский владыка Герасим в Пафнотьеве пустыни. Того ж месяца в 28 в среду в 11 часу дни преставися пресвещенный митрополит Геронтий и положен на Москве в соборной церкви Успение Пречистыя на северной стране. Тое ж весны июня в 11 послал князь великий Иван Васильевич всеа Руси || рать свою на Вятку за их неисpravление: князя Данила Васильевича Щеня, да Григорья Васильевича Морозова и иных воевод со многу силою. Они ж шедше города поимаша, а самех вятчан к целованью приведоша, а арян к роте приведоша, а вятчан больших людей з женами и з детьми изведоша, да арских князей, и тако возвратишася. И князь великий вятчан земских людей в Боровце да в Кременцыви посаде, да и земли им подая. А торговых людей вятчан в Дмитрове посади, а арских князей пожаловал || князь великий отпустил во свою землю, а коромольников смертию казнил. Того ж лета месяца августа в 9 на память святого апостола Матвея свещена бысть церковь Благовещение Пресвятия Богородица на великого князя дворе на сенех. Того ж месяца в 20 на память святого пророка Самоила свещена бысть церковь Василей Кисарийский, придел у Благовещения.

В лето 6998 преставися король Угорский Матиас, а с великим князем был в любве и в докончании || и в братстве. И восхоте Максимиян римский король над Угорскою землею королевство держати; панове же угорские и земля вся не восхотеша его. И Максимиян же посла силу свою на Белгород на Угорский, взяша его. Панове же угорскии послаша ко Владиславу х королю Чешскому Казимирову сыну короля Польского и взяша его с Чешского королевства на Угорское королевство. Максимиян же Римский король со Владиславом взя мир и докончание: Белаграда ступися || Владиславу, а Виена и вся Авестрская земля Максимияну бысть. Тое же осени декабря приеде служить князю великому Ивану Васильевичу на Москву князь Дмитрий Федорович Варотынской ис своею отчиною от Литовского короля Казимера. Того ж лета приехаша на Москву от короля Казимира к великому князю Ивану Васильевичу служити князь Иван Михайлович Перемышской из своею отчиною, и князь Иван Белевский с своею братьею со князем || Ондреем, да со князем Васильем из своими отчинами. Тоя ж зимы прииде от Рима на Москву брат великие кня[г]ини Софьи именов Андрей сын Фомин даспота Амореяского, да с ним вместе приидоша послы великого князя Дмитрия да Мануйло Ивановы дети Ралева и приведоша с собою к великому князю лекаря Мистро Леона жидовина из Винецеи и иных мастеров фрызственных. Тоя ж зимы месяца марта в 7 с субботу на неделю || в 8 час нощи преставися благоверный и хр[и]столюбивый князь великий Иван сын великого князя Ивана Васильевича всеа Руси старейший, первые его княгини Марьи дочери великого князя Борисовы Александровича Тверскаго. И положиша и во церкви Архангела Михаила на Москве, иде же и прародители его лежат. И жив всех лет 32 и 20 дней. А болел камчугою в ногах. И виде лекарь жидовин Мистр Леон похваляся рече великому князю Ивану || Васильевичу, отцу его: яз излечю сына твоего великого князя от тоя болезни, а не излечю его яз и ты вели мене смертию казнити. И князь великий Иван Васильевич впоняв веру речем его, повеле ему лечити сына своего великого князя. И нача его лекарь лечити: зелие пити даст ему и жещи скляницами по телу, вливая горячею воду, и от того ему тяжчая бысть и умре. И того лекаря Мистр Леона велел князь великий Иван Васильевич поимать, и после сорочин сына своего великого князя повеле его казнити, головы отсеци. И секоша || ему головы на Болванови...